

**Naalakkersuisut oqartussaaffiit nunatsinnut angerlaassassarineqarsinnaasut ilanngussaq 1-imi allassimasut Namminersorlutik Oqartussat inatsisaani allassimasuni suliassaqarfiit pineqartut pillugit Naalakkersuisut nalunaarusioqqullugit peqquneqarnissaanik Inatsisartuni aalajangiiffigisassatut siunnersuut. Nalunaarusiaq, kingusinnerpaamik UPA2018-imi Inatsisartunut saqqummiunneqartussanngortitassaq, suliassaqarfiit ataasiakkaani tamani tulluuttunik nalunaarsuiffiussapput:**

- a. Suliassaqarfiup ingerlanneranut ullumikkut Naalagaaffimmut qanoq akeqarpa, Kalaallit Nunaannullu qanoq akeqassava illersorsinnaasumik suliassaqarfik ingerlatissappagu?**
- b. Suliassat ingerlannissaani piginnaasat suut eqquutsinneqassappat, Kalaallit Nunaanni Namminersorlutik Oqartussat suliassaqarfik ingerlanneqartumik illersorneqarsinnaasumik ingerlatsissaguni?**
- c. Iluqutigineqartussat akornutaasinnaasullu suliassaqarfiit ingerlanneqartut angerlaannerini suut kingunerissavai?**
- d. Suliassaqarfiit ingerlanneqartut angerlaannissaanni suliassat piffissami sivikitsup iluani, piffissami akunnattup iluani imaluunniit piffissap sivisuup ingerlanerani suliarineqarlutik tullerriaarneqarnissai Naalakkersuisunit ingerlanneqartussaasorivaat?**

(Inatsisartunut ilaasortaq Aqqaluaq B Egede, Inuit Ataqtigiit)

### **Akissuteqaat**

(Naalakkersuisut Siulittaasuat)

### **Siullermeerneqarnera**

Naalakkersuisunit Aqqaluaq B Egede Inuit Ataqtigiit siunnersuuteqarneranut qutsateqarfigaarput.

Ulloq 21. juni 2009 maani nunatsinni ukiut 30-it Namminersorerullutik Oqartussaqaarerluta Namminersorneq eqqupparput. Namminersorneq pillugu inatsisikkut namminersorsinnaanermut piginnaatitaaffik aalajangersarneqarpoq, kalaallit oqaasii nunatsinni pisortatigoortumik oqaasiulerput, pisuussutit nunatta iluaniittut oqartussaaffigilerpavut, danskit naalagaaffianiit suliassaqarfinnik amerlanerusunik tigusisinnaanissatsinnut oqartussaaffeqalerpugut inuiaallu kalaallit nunat tamat akornanni inatsisit malillugit inuiaat kalaallit namminneq aalajangiisinnaassuseqarlutik inuiaanerat akuersissutigineqarpoq.

Inuiaat kalaallit namminneq aalajangiisinnaassuseqarnerannik isumaginnissinnaanermut ilaavoq, Danmarkimiit Kalaallit Nunaannut oqartussaaffimmik akisussaaffimmillu suli annertunerusumik tigusiniarluta aalajangersinnaanerput, taamaasilluta aalajangiisinnaassuseqarnerput nalinginnaasumik annertusisinneqarsinnaalluni.

Suliassaqarfinnik allattorsimaffik I aamma II-miittunik tigusisinnaanissamut aalajangiisinnaassuseqarneq Namminersorneq pillugu Inatsimmi ilanngussamiittoq Namminersorlutik Oqartussaniippoq. Suliassaqarfinnik ataatsimik tigusinerup kinguneraa inatsisiliorsinnaanermut aamma malitsitsisinnaanermut oqartussaassuseqarneq kiisalu suliassaqarfinnut atasumik aningaasartuutinik aningaasalersuisinnaanermut isumaginnissinnaaneq. Tassaniippoq soorunami oqartussaaffinnik allaffissornikkut

ingerlatsinissamat pisussaaffeqarnej. Suliassaqarfiit ilaat qitiusorujussuupput annertoorujussuullutillu, tassanilu naatsorsuutigineqassaaq naalagaaffeqatigiinnermi oqartussaasut aamma Namminersorlutik Oqartussat akornanni siumoortumik qulaajaasarnissat peqqissaartumillu aaqqissuussisarnissat.

Naalakkersuisut isumaqarput, aalajangiinissamat siunnersuut Namminersorneq pillugu Inatsimmi siunertanut naapertuulluinnartuusoq. Nassuiaammi taamaattoq suliassaqarfiit ataasiakkaat annertussusiat pillugit takunnissinnaanermik pilersitsissaaq tassungalu atasunik ingerlatsinikkut aningaasartuutinik, tassani suliassaqarfinnik tiguisinnaanerit peqqissaartumik aaqqissorluakkamik periuseqarluni qulaajarneqarsinnaapput pisariaqassappallu pingaarnersiorlugit tulleriaarneqarsinnaallutik.

Tassunga atatillugu suliassaqarfinnik tiguisinnaanerit pillugit suliat aallartinneqareersimasut pillugit Naalakkersuisut paasissutissiissapput. Tassani pineqarput nunami (nunami) sulinermi avatangiisinut suliassaqarfik, taamaalillunilu sulinermi avatangiisinut tunngatillugu suliassaqarfiup tamarmiusup ilaata kingulliup akisussaaffigilerlugu tiguneqarnissaa kiisalu nunanit allamiunut suliassaqarfiup aamma killeqarfinnik nakkutiginninnerup akisussaaffigilerlugu tiguneqarnissaa.

Nassuiaatit marluusut tamarmik, piffissami qanittumi aamma ungasissumi aningaasaqarnikkut sunniutaasussanik aamma sulisoqarnikkut sunniutaasussanik naatsorsuinernik ilaqartinneqartut, UKA2016-imi Inatsisartunut saqqummiunneqarnissat naatsorsuutigineqarpoq.

Naalakkersuisunit erseqqissaatigerusunneqarpoq, naalagaaffimmiit suliassaqarfinnik tigusinissamik pilersaarutaasinnaasut aalajangiinerillu kinguarsarneqassanngimmata pinngitsoortinneqassanatilluunniit taamatut nassuiaammik suliaqarnerup kingunerisaanik.

Taamatut oqaaseqarlutik Naalakkersuisut siunnersuut akuersissutigineqartussatut inassutigaat.